



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 7



India aser China na ya kidanger, aser pilatsütsü makok: Xu Feihong



Nepal ato kilonser tanubutisang-i tenangzüktep agiogo

VOL. XXIII ISSUE NO. 164 (ADOK 164) DIMAPUR KÜPTOKNÜ (SATURDAY) METSÜREMI (MARCH) 28, 2026 ₹ 5.00

NLA-i Rs 22,127 crore Budget agizükogo

Kohima, March 27, 2026 (TYO): Nagaland Legislative Assembly-i Hokolbarnü 2026-27 atema State Budget agizükogo. Iba ajanga Nagaland indang Consolidated Fund nungi Rs 22,127 crore amshitsü tashi agütsür.

Chief Minister Neiphui Rio-i benokba Nagaland Appropriation (No. 4) Bill, 2026 ajanga Budget mulunga agizük. Iba ajanga March 31, 2027 nung tembangba financial year asoshi sorkari Rs 22,127.33 crore endoktsü atema tashi agütsür.

Budget nung shilem tuluba revenue expenditure lir aser ibaji Rs 17,972.70 crore lir. Külen capital expenditure Rs 4,154.63 crore shi lir aser iba ajanga itasen, pensions aser administrative costs den infrastructure aser development spending lir.

Budget nung shilem tulu ka pensions aser retirement benefits asoshi lemezükja lir aser iba asoshi Rs 3,928 crore enoka lir.

Ano, civil police, school education, health, rural development aser public works wadangtem asoshi senotsü aika lemezükja lir aser iba ajanga sorkari ketdangsubaren, service delivery aser infrastructure nung temulung agütsüba sayur.

2026-27 State Budget nungsa roads & bridges, power, water supply aser urban development wadangtem asoshi sen aika lemezükja lir saka senotsü periabo masü.

Roads, housing aser power amala mapa nung senotsü aika lemezüktsüogo saka item asoshi Centre sorkar dak ang teyari tuluba yua lir.

Tang Finance Commission cycle kübok revenue deficit grants maliba ajanga senotsü

tayongzüka ajurur ta Nagaland sorkari ashiba mapang ka Budget agizükogo.

"Centre nungi teyari mengura asenoki salaries, pensions aser debt servicing nung timtem ajurutsü" ta Chief Minister Rio-i ashi.

2026-27 atema Centre nungi minimum requirement Rs 4,500 crore ta asadangtetogo aser Union Finance Minister nungi tenangzükbatem ajanga senotsü angutsü imlar ta pai ashi.

State Budget den külemi NLA-isa appropriation bills asem agizük aser item ya taoba mapang senotsü endokba aser supplementary demands dak sendakbatem lir.

Assembly - isa Supplementary Demand for Grants for 2025-26 mulunga agizük aser iba ya tan financial year nung excess aser unforeseen spending nung Rs 5,366.15 crore talila endoktsü atema lir.

Nagaland Appropriation (No. 3) Bill, 2026 ajangasa Supplementary Budget agizük aser iba ya March 31 tashi nung expenditures atema Consolidated Fund nungi senotsü agizüktsü tashi agütsüba lir.

2019-20 financial year nung excess expenditure Rs 1,97,95,00,000 agizüktsü atema Appropriation (No. 2) Bill, 2026 ta ser Assembly-i agizükogo. Iba ya NLA nung Public Accounts Committee ajanga 137th Report 2024-25 nung shia aliba ama lir.

Maneni, financial year 2018-19 nung excess expenditure atema Appropriation (No. 1) Bill agizük aser iba ya Rs 1 lakh atema lir. Iba yaa PAC-i 134th Report 2024-25 nung shia lir.

Taruba NLA session nung ang FNTA Bill benoka jembitsü

Dimapur, March 27, 2026 (TYO): Nagaland Legislative Assembly indang taruba emergent session nung ang Frontier Nagaland Territorial Authority Bill, 2026 benoka jembitsü telemtetba agiogo.

Chief Minister Neiphui Rio-i iba bill nung enoka aliba onüktem jungjunga asadangt sü ateam mepishiba sülen NLA-i thinentsü lemtet.

Deputy Chief Minister Yanthungo Paton-i March 26 nü Bill benok aser shitakba agibo tanü olemteper agizüktsüba liasü. Ajsüaaka, Centre sorkar den

Eastern Nagaland Peoples' Organisation (ENPO) aser Eastern Nagaland Legislators Union (ENLU) nungeri Bill asadangtsü atema mapang talila meshilok.

Eastern Nagaland nungeri pei sasa ketdangsüa aotsü inyakyim aginüba agizükter ajsüaaka iba mapa inyaka maodang temzüng-ozüng dak sendakba mapa inyaksü nungdaker. FNTA ajanga eastern district 6-Tuensang, Mon, Longleng, Kiphire, Noklak, aser Shamator nung terenlok bener arutsü nükjidong lir ta CM Rio-i ashi.

Nagaland sorkari NLTP Act; Oil exploration asadangdar



March 27, 2026 nü NLA Hall, Kohima nung Chief Minister Dr. Neiphui Rio-i budget indang General Discussion nung jembiba noksa ka angur.

Kohima, March 27, 2026 (TYO): State sorkari substance abuse azüoktsü atema mapa inyaker aser Nagaland Liquor Total Prohibition (NLTP) Act, 1989 kanga junga asadangdar aser iba dak sendakba nung asüngdangya südar ta Chief Minister Neiphui Rio-i ashi.

Assembly nung Budget 2026-27 atema olemtepa mapang public health ajungkettsü aser lokti tiptema alitsü atema NLTP Act ya yanglu saka iba mapa inyakba nung tangatetba balala adokogo ta CM Rio-i ashi.

"Loktiliba nung shilem kari iba tenokdangba akangshitsü atema nungiter saka tangartemi tayongzükbatem aser ozüng alema inyaksangshiba atema tebilemtsü bena iba ozüng meyipa reprangshitsü shidanger" ta pai ashi.

Sorkari tebilemba ajak agizükter aser enforcement agencies-i mapa inyakdang tayongzüka ajuruba aser tashi itshitsü, public awareness alitsü aser rehabilitation maparen nungdakba ajiteter ta CM Rio-isa metetdaksü.

Sorkari iba Act atema tebilemba ajak angadanga aser

asüngdangtepa asadangdar. Tanü drug achiba tayongzüka tulu ajurua lir aser enforcement agencies-i NDPS Act kübok mapa inyakdar ta paisa shisem.

"2025 nung ken o 157 benok aser nisung 260 puogo. Ajsüaaka iba ozüng mapa küma inyakba dak alia tangatetba nung tayongzükbatem koktettsüla aser iba asoshi sorkari Nagaland Community Wellbeing Initiative tenzükgogo, koba ajanga lanur nem shisatsü nung teyari agütsütsü" ta CM Rio-i ashi.

Nagaland nung 1994 nungi ken o balala ajanga oil and natural gas exploration maparen anendaka lir. Kümtem süia arudang state sorkari mera balal agiogo aser iba nung 2012 küm petroleum rules latetba aser Centre den olemtepa dena lir, saka ozüngren tsütsü tayongzükbatem aser haihaura mekatetba ajanga iba mapa nung tetsükdaktsü ajurua lir, ta pai ashi.

State sorkari Union Ministry of Petroleum and Natural Gas dang ken o tem angatetteptsü asoshi ayongzükgogo aser tesüsabubaji February 2026 nung

parnok den ajurua jembio go ta CM Rio-isa ashi.

Food and Civil Supplies Advisor & MLA K. T. Sukhaluia State revenue ajungkettsü atema oil exploration tenzükgtsü aser NLTP Act meyipa reprangshitsü onük benoka lemsatetp.

Nagaland nung oil resources jenti lir saka iba rongsen magitetba ajanga rongsenketzüng nung timtemer. Myanmar den anasatetba aliba ajanga Nagaland nung substance abuse khuret tulu ajurua lir. Myanmar nung ozüng alema opium yanglur aser iba jagi Nagaland nung drug trafficking bulur ta Advisor Sukhalui-isa ashi.

NLTP Act ajanga nükjidong metongtet aser Nagaland nung yi talubosa angur, talisa yi tamajung aser temeyokteper angur aser iba ajanga temang raksaba den lokti nung khuret balala bentsür arur ta paisa ashi.

NLTP Act ajanga yi shishilembaba miima inyaker aser ibaji ajanga mapa shitak meinyakteter anungji iba Act meyipa reprangshitsüla ta Advisor Sukhalui-isa metetdaksü.

14 buba NLA Tibuba Session takok ngua agiogo

Dimapur, March 27, 2026 (TYO): Nagaland Legislative Assembly Speaker Sharingain Longkumer-i March 27, 2026 nü 14 buba Nagaland Legislative Assembly indang Tibuba Session shibangogo.

NLA Speaker, Sharingain-i züngsem ajak dang amalitepa, tangatetba tajung agi olemtepa aser session piyong shilem tajung agiba atema pelaba metetdaksü.

Züngsem ajak külemi tongtipang tebilemtsütem asoshi

olemtetpa aser state tejakleni aoba aser renlokba nung shilem agiba asoshi pelar ta pai ashi.

Tayongzüka balala liaka Assembly nung olemteper tajung kaogo aser Nagaland renloka aotsü asoshi lemtet tajungtem agiogo ta paisa shisem.

Paisa züngsem ajak dang nübortem tenzükgtsü asoshi bendanga agütsüshitsü, tenangzüka agitsü aser tebilemtsü khuret abentsü ayongzükg.

Department balala nungi

ketdangsurtem aser staff-i nungitba aser amalitepa yariba atema tenüngsang agütsür. Maneni Nagaland Police, security personnel, medical team, fire and emergency services, aser media nisungtemi session tiptema agiba nung yaritepa atema pelar ta NLA Speaker Sharingain-isa metetdaksü.

Secretary-i anir Assembly Secretariat ajanga session tiptema agia otettsüsa acha-ayangba atema tenüngsang agütsür ta paisa shisem.

Mokokchung nung Clean Election fellowship sentong agi



Dimapur, Metsüremi/March 27 (TYO): Nagaland Baptist Church Council (NBCC) ajanga District Administration Mokokchung den lungjemer Deputy Commissioner, Mokokchung aser staff tem den Clean Election Movement indang sensaksema aser fellowship sentong ka Deputy Commissioner, Mokokchung indang Conference Hall nung March 26, 2026 nü agia liasü.

Rev. Dr. Mar Pongener, General Secretary, NBCC ajanga sentong tenzüka jembidang, ibai sentong ka agiba kisüing masü saka NBCC clean election movement indang jembishinü akatsü, külemi

lungjemer inyaksü khuret lemsateptsü asoshi sapang ka lir, koba lokti nung temelenshi bener arutsü asoshi NBCC ajanga küm aika bener arur, ta ashi.

Nagaland nung election den anidakba tebilemstü balala atema telangzüba ka ama NBCC-i clean election movement ya tenzüka aser ajidang masü stakeholders, voters, lenirtem, civil societies aser institution balala sakdaksütsü asoshi lir, ta ashi.

Iba movement indang mangdang ya systems nung temelenshi bener arutsüba atema kisüing masü saka yimya nunga temelenshi bener arutsü

atema lir aser iba atema arok lungjemer tangatetep nung inyaksü nüngdaker, ta pai ashi.

Iba mangdang takok angutsü atema asenoki inyaksangshi nung akang-akang nokdaksü nüngdaker aser pei sasep nung temaba jenjangi ajungkettsüla, ta ashi.

Dr Villo Naleo, Secretary, Social Concern Department, NBCC ajanga "NBCC initiative for clean election, vision, and commitment and way forward" indang presentation agütsüba mapang Clean Election Movement indang nükjidong aser mangdang tem lemsatepa liasü.

(Maneni tapak 8 nung...)

28 Koridang AC nung Bye-Election agitsü atema senden amen

Dimapur, Metsüremi/March 27 (TYO): 28 Koridang (ST) Assembly Constituency nung Bye-Election agitsü aliba mechi aser conduct of Election Rules, 1961 nung aliba ama election nung tokteper/Election Agents, District Nodal Officers of EEM/EVM/Manpower management/Transport Management Cell/Postal Ballot/ Model Code of

Conduct/ Media Management Cell shisadokden senden ka Deputy Commissioner, Mokokchung indang Conference Hall nung March 27, 2026 nü mena liasü.

Iba senden nung Returning Officer & SDO (C), Nockpai Konyak aser Nodal Officer, Expenditure Monitoring Cell & EAC, Kewimesin Nriame nati Election Commission of India ajanga lateta yutsüba ama

electioneering procedures dak sendakba nung Model Code of Conduct indang rateta ashi, kong candidates ajungai shidak anidaksü nüngdaker.

Election Commission of India nungi ketdangsürtem, General Observer Dr. Neeraj Shukla IAS, Expenditure Observer D. Sreedhar Reddy, IRS aser Police Observer Sandeep Karra, IPS nungera iba senden nung dena liasü.

Trance Effect-i Def Leppard pur kentenba sentong lapoktsü



Dimapur, Metsüremi/March 27 (TYO): Nagaland nungi tang kanga kara renloka aoba rock band Trance Effect puri Shillong nung nüngtugu rock kentenba telok Def Leppard indang kentenba sentong lapokja liasü.

Trance Effect puri parnok indang ken aser sabang nung kentenba yimya ajanga sentepa aliba loktsü atsüa arua jangrademdakja liasü.

Kentenba sentong metenzük dang soundcheck asüba

mapang Def Leppard indang guitarist Phil Collen-i band indang guitarists, Tako Chang aser Temsujungba Jamir na den sensaksema liasü.

Parnok indang sound agi temulung süa pai parnok indang tone, equipment indang asüingdang aser guitar kanga junga jangyumedema atemba atema tenüngsang agüja liasü.

Parnoki lokti kanga sapuba ken "More Love," tena parnok indang set tembanga liasü.

Kentenba sentong

tembanga sülen Meghalaya Chief Minister Conrad Sangma-i Trance Effect pur ano sentong ka nung ken ishika atentsü atema jaok. Iba sentong nung parnoki parnok indang ken "New Favourite Mistake" aser "New Beginning," aten aser maneni sentepa aliba lokti atsüa arua liasü.

Iba alizüing tasen tongtetba sülen Trance Effect pur maneni kentenba nung renloka odar aser nüngtugu aser nüngtugu musician temia meteta kümдар.

Nagaland Assembly nung Jan Vishwas Bill agizükogo

Kohima, Metsüremi/March 27 (TYO): Hokulbarnü Nagaland Legislative Assembly nung Nagaland Jan Vishwas (Amendment of Provisions) Bill, 2026 agizükogo, koba ajanga minor offences tem agiener aser state ozüing balala tajungba kuma yanglushitsü.

Statement of Objects and Reasons nung shia aliba ama iba Bill taginüba ya, Nagaland nung governance ya temerenshi tulu nungi compliance-based, nüburtem dak rangloker framework yanglutsü asoshi lir.

Tang aliba state indang ozüing kar nung minor, technical mesüra procedural violations tem criminalise sütsür aser ibaji ajanga aiben nüburtem aser businesses timtemer, khuret tuluba kumdaksür, shidakba ozüing amshiba nung terenlok ajema alir, ta Bill nung shia lir.

Public safety, environment mesüra national interest nung timtem magütsüba aibelen tila

tem decriminalisation süja iba ama ozüing tem melenshitsu Bill nung ashir.

Iba Bill nung criminal penalties tem civil penalties, administrative actions aser compounding mechanisms agi melentsür aser aibelenba yimya nung ajemdaker senchi telesa balala meshitsü.

Bill yagi digital compliance systems aser time-bound processes ajungkettsür aser state nung 'ease of doing business' tajungba kumdaksüba nung 'regulatory uncertainty' tajemba kumdaksütsü.

Public health, safety aser revenue nung kongshiba aibelen tulutem asoshi maneni temerenshi tesashi agütsütsü Bill nung tejangja shia lir.

Merenshitsu tetsübo nung masü saka tamang akaba nung ajemdaker 'voluntary compliance' ajungmesotsü nükjidong nung iba Bill ya yanglu.

(Maneni tapak 8 nung...)

NPF Mokokchung Division-i district nung AC ajunga semdang



Dimapur, Metsüremi/March 27 (TYO): NPF Mokokchung Division ajanga March 26 & 27, 2026 anogotem 21 Tuli Assembly Constituency nungi 30 Alongtaki Assembly Constituency tashi semdanga jaja liasü.

Iba tour ya N. Bendang Jamir, Senior Vice President and In-charge of Mokokchung Division den Repameren Yaden, President, Mokokchung Division nung lenisüba kübok Central Office Bearers temi anir jaja liasü.

Parnoki iba mapang

constituencies ajunga nung nüburtem den sensaksem tajung kaa terenlok asoshi mangdang lemsatepa liasü.

Lenirtem aser party workers temi bendanga agütsür telungjem nung tashi aliba sayua liasü.

Organization indang guiding principles tali asendenshia iba sentong ya tanaben sendakteptsü asoshi tongtipang sapang ka ama liasü.

Anogoshi inyaksangshiba alema oa iba sentong ajanga arok aintsü asoshi party indang inyakyim tali akangshia liasü.

CMO Mokokchung ajanga Medical Examination atema metetdaksür

Dimapur, Metsüremi/March 27 (TYO): Chief Medical Officer (CMO), Mokokchung, Dr. Tiasunep-i sangdong ka nung, Mokokchung district nung grade III aser IV staff tem service confirmation, Invalidation and Commutation of Pension atema District Medical Board ka tentetogo, ta metetdaksü.

Medical Examination ya Chief Medical Office nung April 28.04.2026, May 28.05.2026, June 26.06.2026, July

28.07.2026, Aug. 28.08.2026, Sept. 28.09.2026, Oct. 28.10.2026, Nov. 27.11.2026, Dec. 14.12.2026, January 28.01.2027, February 28.02.2026, aser March 27.03.2027 anogotem agitsü.

Anungji Head of Office ajunga dang item anogo atongtsü anogo tenet (7) jelia tenüngtem, designation aser contact numbers tem CMO Mokokchung office nem agütsütsü ayongzüker, ta sangdong ajangasa ashi.



March 27, 2026 nü New Delhi nung Ato kilonser, Narendra Modi-i TV screen tulu nung Parliament nung Budget senden tagidak aser 'Shree Ramjanmbhumi Temple, Ayodhya nung 'Surya Tilak' sentong tagidak külemi rebrangba noksa nung angur.

Rajnath Singh leniba nung ministerial telok kati tensa asadangtsü

New Delhi, March 27 (Agencies): Union Defence Minister Rajnath Singh leniba nung inter ministerial telok kati tang Middle East nung rara ajanga tebilemstü balala adokba mita rebranga asadangtsü, ta osang ka ajanga metetdaksü. Rajnath-i aniba Inter ministerial telok nung züngsemtem rongnung Union home minister Amit Shah, Union finance minister Nirmala Sitharaman aser Union

petroleum minister Hardeep Singh Puri nungera densema lir. West Asia nung rara ajanga energy security, totzü aser LPG supply tsütsü tebilemstü akaba mapang nung iba telok tenteter. Tan hopta tejaklen Ato kilonser, Narendra Modi-i India nunger rongsenkettzüng jenjang mekongshitsü atema telok tenet tenteta tensa asadangtsü, ta sangdonga liasü. Rajya Sabha senden nung jembidang Modi-i, West Asia

nung rara ajanga alima tesem ajaklen rongsenkettzüng jenjang kongshidar, aser ibaji tanaben asüngsashitsü atema mapang agitsü, ta metetdaksü. Covid-19 wara mapang nung ajangshiba nung ajemdaker Modi-i, item telok tenet jagi quick-response teams ama inyaksü; talisa petrol & diesel, fertilisers, gas, supply chains aser jenjang atuba tensa mita asadangtsü, ta metetdaksü.

India aser China na ya kidanger, aser pilatsütsü makok: Xu Feihong

New Delhi, March 27 (Agencies): United States aitsüba olen ka nung Hokolbarnü Chinese ambassador to India, Xu Feihong-i, India aser China na tsüngda tesendaktep tsütsü terenlok kanga aliba ya kari aria bilemja inyakba agi masü saka linük ana nungi nüburtemi meranga inyakba aser shisa akaba ajanga lir, ta ashi. US deputy secretary of state, Christopher Landau-i, Washington-i China den inyakba ama India denbo aibelen masütsü, ta jembia liasü. Iba dak sendakba nung India external affairs minister, S Jaishankar-i, India ajungkettsüji kar aibelen ajanga masü saka India-i pei sasa inyaksü, ta jembio. India-China youth dialogue nung jembidang Xu-i India aser

China naprongla amalitepa inyakba ajanga tajangzük angutsü mangdang ajungketjang, ta ayongzüka liasü. "Tesüba küm ishika tsüngda China aser India na tsüngda tesendaktep tsütsü terenlok kanga kaogo. Iba ya tangar kari aria bilema inyaksüba agi masü saka asen nüburtemi meranga inyakba aser shisa kaa inyakba den amalitepa inyakba ajanga lir," ta Xu-i ashi. "Tanübo asen linük anaprong terenlok aser linük yangsershiba tsütsü kanga tongtibang mapang ka nung lir. Terenlokji asen sasa meranga inyakba ajanga dang ataloktsütsü, iba denji külemi linük anaprong amalitepa inyakba ajanga tajangzük angutsü atema kati ka pusema inyaksü," ta ambassador Xu-i ashi. India aser China na ya

kidanger, aser ibaji pilatsütsü makok, ajisüaka karibo linük ana tesünep nung alibaji maginer, ta pai ashi. "Parnoki asenok tsüngda mangatettep tuluba kümdaktsütsü meranger aser asen linük ana tsüngda mangatettep nungi tajangzük angutsü imlar," ta pai ashi. "Tang temelenshi tulu aliba mapang ka nung lanurtemi pei sasa shisa kaa shisadangtsüla aser asen linük ana nüburtem tsüngda mangdang tajung aser tangatetba tajung alitsü atema inyaksü," ta pai ayongzük. "Global South nung tongti züngsemtem ama China aser India nati tongtepratep aser amalitep jenjang tashi itshitsüla, terenlok dak linüktem temeden kümzüka ayutsüla aser Global South ya terenlok lenmang nung lenitsüla," ta paisa shisem.

PASTOR KA NÜNGDAKER

Bangalore Ao Baptist Fellowship (BABF) nung tenzüktu asoshi Tajaba tejangja akaba aser Tanela agi sünga aliba Sannüker ka nüngdaker. Tazüngba nung BD/ M.Div aser iba dang temaba azüngba ATA/ Serampore Institution nungi asütsüla, Arogo nung toklanga tenzükbä küm ishiba agi pongubosa (5) inyakba nebu asütsüla, aser arishi küm 40 - 55, Ao aser english oshi nung tetemsü, kibong kümer alir, Bangalore Ao Baptist Fellowship aser ABAM inyakyim kübok tenzüktu nangzüktetba Tsüngrem tenzüker. Tejangrartemi April 30, 2026 tashi nung iba tenzükbä mapa asoshi tejangjaba nung agütsüa aliba email nung tongteprateptsü akok.

Email: ababbangalore@gmail.com

Sorkari petrol aser diesel totzü nung saru sen 10 ajemer

New Delhi, Metsüremi/ March 27 (Agencies): Tang West Asia nung rara aliba ajanga totzü tsütsü tebilemstü aliba mapang ka nung Centre sorkari petrol aser diesel totzü nung saru ajemogo, ta ketdangsertem osang ka ajanga metetdaksü. Sorkari petrol litre ka nung tamalen sen 13 aliba nungi sen 3 tashi ajemtsüogo, aser ibaji litre ka nung sen 10 ajemtsüba lir. Iba denji kasa sorkari diesel litre nung sen 10 aliba nungi 0 dang kümtsüogo aser iba ya litre ka nung sen 10 ajemtsüba lir.

aliba ajanga totzü tazü jenjang kanga tuogo. United States Tir, Donald Trump-i, Iran den ken o jembiba kanga junga odar, anungji rara anentsüa akok, ta metetdaksüogo. Oil Minister Hardeep Singh Puri-i, tesüba ita ka tsüngda International crude oil jenjang kanga tuogo; barrel ka nung dollar sen 70 aliba nungi sen 122 kümogo aser ibaji ajanga alima tesem ajaklen totzü jenjang atur, ta metetdaksü. Sorkarisa tongtibang petroleum products nunga export saru rebrangshiogo. Diesel export saru litre nung sen 21.5 aser petrol export sarubo 0. Public sector units-i Nepal, Bhutan, Bangladesh aser Sri Lanka ama kidanger linüktem dangi export asüba nungbo saru malitsü.

Ajisüaka petrol pump nung petrol aser diesel jenjangji kasa dang asütsü, kechiyong saru ajemtsüba oil marketing companies-i takoksa anguba atema amshitsü. Tang West Asia nung rara

Iran-i Israel amakba missiles nung 'Thank You India' zülur liasü

New Delhi, March 27 (Agencies): Tang West Asia nung raraba mapang Iran-i Israel tsütsülen khaloktsüba missiles nung "Thank You, people of India" ta zülur liasü. Iba noksaji Mumbai nung amenoka aliba Consulate General of Iran-i online ajanga lemsatetep. Israel tsütsülen khaloktsüba missiles nungji Iran Aerospace Force nung sepaitemi "Thank you to people of India" ta zülur liasü. Iba denji kasa Iran nunger missiles nungji Spain, Pakistan aser Germany nunger danga pelaba zülur liasü. Iran-i Operation True Promise 4 kübok 83buba operation nung missiles nungji India densema linük kar dang pelaba orenji zülur liasü. Islamic Revolutionary Guard Corps (IRGC)-i sangdong ka ajanga, IRGC-i tang tesüsa region nung aliba America aser Israel sepaitem indang kojjen maakogo, ta metetdaksü. Item rongnung Ashdod nung aliba totzü rüzüngba facilities, Modi'in anasa sepaitem aser US military information exchange centre ka densema liasü. IRGC-isa Al-Dhafra aser Al-Udeiri na nung US sepaitem amenoka aliba tesemtem den

Ali Al-Salem Air Base aser Sheikh Isa Base amak, ta metetdaksü. Iran nunger missiles nung India dang pelaba metetdaksüba tawa Iran aser India na tsüngda tesendaktep junga akümba agi lir ta bilemer. Iran-i rong senzüba tongti lenmang 'Strait of Hormuz' nokdangogo, ajisüaka India nunger khu abenba rongtembo 'Strait of Hormuz' ajanga süitsü temelaba agütsür. Iran Foreign Minister Abbas Araghchi-i, Iran atema tembar linük ishika rongnung India densema lir, ta shia item linüktem meyong rongbo iba lenmang ajanga senzütsü melaogo. Iba dak alia Jammu & Kashmir nung temelungertemi tenla bendena Iran nung rara ajanga kongshirtem yaritsü atema yokogo. Jammu & Kashmir nung alirtemi senotsü dang masü saka senti osettem aser nüngdakba osettsüset aika Iran nung timtemertem dangi yokogo. Iba sülen India nung aliba Iran Embassy-i India nungertem dang pelaba metetdaksü liasü. India-i Middle East nung rara ya sashia aitsüba den külemi ken o jembiba ajanga rara anentsü ayongzüker.



March 27, 2026 nü Howrah district nung Election Commission indang voters awareness campaign kübok cycle rally nung shilem agirtemi vote agütsüba temaitsü temeyong sayuba noksa nung angur.



TIR YIMYIM YIMOBILEM (EDITORIAL)

DIMAPUR KÜPTOKNÜ METSÜREMI 28, 2026

Chipo nung tesüoktsü mali!

Nagaland asoshi 2026-2027 küm nüngdak nung amshitsü asoshi senotsü sentong Nagaland tatar senden nung benoka jembiteper lateta yuogo. Atangji, tang küm tasenba nung Nagaland nüngdak mapatem asoshi sen crore meyririjang 22 dak tali arutsü teimla nung senotsü sentong yangluogo aser ano osang tajung kaji yaküm küm dang nungibo taküm küm atemdang sentsü tajemba kümer atemtsü teimla nung senotsü teindokba dang nungibo tarubaang teimba asütsüsa latetogo. Ajisüaka, asenok Nagaland budget ya tangar state den medemdangdangbo tangar apu ka yangluba jenjanga masü aser kidanger Assam nung tzümetsüng agi nübertem tntem takoksa ajurudangbo, Nagaland küm ka budget dang nungi teimba Union government-i agütsür. Ajisüaka, pei tashi aser pei kolok yari dang senotsü sentong yanglutsü asünungji, asenoka asenok yari senotsü aika arutsü aser endoktsü asoshi sentong kanga junga renemogo ta bilema renemogo. Aji oda, kar asoshi sen noklangkaji aika saka kar asoshibo sen meyririjangkaji ishika asütsü. Kasaji, kari sen noklangkata ochishia mamshitetsü saka karibo sen meyririjang ter ochishia amshirtem nem sen crore lakh meyririjang ter moatsütsü saka sen noklangka ochishia mamshiteterem nembo tanaben sen 50 dang agütsütsü. Iba ama mesükba tia ka nung, Nagaland state küm tasen asoshi senotsü sentong renemogo, kechiyong senotsü sentong renemaka, Union government nungi tang tashi nung asenok nüngdak terakajia agütsütsü asü magütsütsüar mejangja ka ser renemogo ta Jabili mapa abensang Chief Minister Rio-i ashiba olen nungi angateter. Atangji, Nagaland senotsü sentong ya Nagaland tajungba küma renloktsüba sentong masü saka state government tenzükertem nem ita sen aser pension agütsütsü asoshi renemba sentong amaika dang lir. Ajiserbo, department shia nung tenüng agi crore ishishi lezmüktsüsbajibo kar mapa meinyak ser agiadoktsü aser kari inyakba mapajia shitak meinyaki senji chiadoktsü. Aji oda, Nagaland nungbo ki tulu talang yanglutsü DPR yanglur senotsü lezmükaka, terenemdangbo ki tilaba ser tatsüba küma renemeter. Kasaji, state government-ibo atsü atsü nunga, atsüji merenemdangyongi külenbo laoadoktsü. Aji oda, department shia sen terara lezmükba jagi mapa inyaktsü bilemstüsbajibo anasaia marutsü saka shiba agir shiba magi kenpiga nungteper, küm tom ka shi nungbo mali kümadoktsü. Atangji, Union government nungi mapa balaka atema yokba ka mesüra state budget nung department shia tema lezmüktsüba senjibo tanurtem nem süngojemtsü sen terara lezmüktsü amai lir. Aji oda, tatishitsü ka , kanga dang tongtibang department Agriculture department ama ka nem sen crore 60 lezmüktsüsbaji repringdangra, iba jagi district shia sen crore 4 majung dang atatsü. Iba sen jagi Nagaland nung aluyimertem ket atongtsü asü matongtsü (?) aser atongyonga kechi mapa inyakdaktütsü sentong lir (?) ta rataa bilemer. Kasaji, Nagaland nung tetsür 1000 atema sen crore 2 lezmükja alibajia kodang bilemdangdir, ashiko, iba senji asenoki sübokrem agiba dang nungi kanga agia tajemba asütsüa akok. Aji oda, asenoki senotsü sentong yangluba o asenoki sübokrem agiba aser pen amshia auyaba mapatem na medemdangra, asenoki renemba senotsü sentong nung aliba dang nungibo aseni sübokrem agiba sen teimba adoktsü. Asen Nagaland ya, temeimsüka, iba tia nung odagi. Aji oda, Union government-i sen mapang shitak nung meyokra, government-i ita sen magütsütsü, idangjibo Nagaland nung kibong ajak amai chiyong athitsü. Ano, tang tentetba Frontier Nagaland Territorial Authority nema state government senpong nungiang sen agütsütsü renem süra, ajia tarendaktsüka lir, kechiyong state government ket nung kecha maka aser tarutsü teimla nung dang küm tasenba atema senotsü sentong ya renema lir. Aji oda, makayonga, ngur külen FNTA nem agütsütsü atema sen crore 100 agütsütsü latetbajia, ashiko, tepelatsü mapa ka masü saka tejashitsü aser tesasatsü mapa-ang ka kümadoktsüa akok. Aji oda, chipobo tongdaka ayu saka kong nungi jang bener arua süoktsü ta bilemba purtemji asenok 'oppositionless' purtem lir.

OLEMSABANG

Aamongchen Otsü

Temjenyuba Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Ainer Temeli telok: Oji and Abooo "ami khan du ainer temeli telok lir, aru moi khan laga ama papa khan be Ao manu heh ase hoilibe moi khan telok pora Ao language du tera tera dang koboli pari ase, hoilibe ene understand du kuri ase de. So apuni khan pora mind nakoribi de please. First of all sobaliba du ki ase ami khan ainer temeli group pora tera hoilibe najani etu pora janibo mon jaikene ahishey. We mean we want to learn uuhhmmmm..... meeetetsüba atema aruba lir." Kanga Pelar.

Otsüla: Aya Ayah Ayah tesüngmangtsü ya koda! Tebu tanabuba telok yabo asen yimer oda aoerbo masüa na? Item yabo ainlen talang nungi ainer tesa ka aruba amaidang nibo angar ato, olen paika nungji tesüngmangtsüka asen oshibo züngteta ka dang inoksema jembiogo. Parnoki jempiba yaba nibo kecha mangatetter, iba ya kechi oshi jembir. Ayaya! tanü ya nupang tu nung tzü süloktsü amai dangbo masütsü südito Tebu? Naia angateter asü?

Obula: Nia parnoki jembiba yabo tera dang angatetera saka angatetera jembitsüsa merangdija tantsü. Süangni naisa maneni parnok den ya akok tashi jembishinüa asüngdangya süangma.

Otsüla: Ainer temeli telok, nenok rongnung ya kin kidong ajak abensa mena kar amai dang repranger, anungji ni kar dang tasüngdangba kar asüngdangdi. Hai! Kongro tajung Narola, nai inoka aliba süpetiji kechi kidong indang?

Narola: "Otsü obu matibi koi ase nah sathi sathini khan, aru asking my clan mekhela right?" Telok :Haoja, enika ase naki.

Narola: Otsü obu etu nah longkumer süpeti lir.

Otsüla: Tenü nai kodasür na longkumtsür sür nung longkumer ta amshir?

Narola: "Oba du longkumer ase koishi etu pora moi be longkumer lir."

Otsüla: Tenü nebuji longkumer sürabangla najibo tetsür ka asü nung longkumtsür ta ashitsüla ato, aji longkumtsür süpeti lir aser tebur sürabangla longkumer ta ashir aser aji shidak saka najibo tetsür asü nung longkumtsür ta tanü nungi amshiang no. Aya! Ainer lima nung meyoktepa alirji, aibenbo tsürabur denji jembitsüa mapang mangutsü, nenok ainer den lipaliyomga aodang pei bendanger tembar teimba, saka ne oshi, ne ayak tamendaktak aser ne indang tera ner tetsü oshi ajak amadoker yamai ainer temeli dener dang lirapangla kenübo naji shibar mejangja kümadoktsü. Ajidang masü tetsüri koma ashitsü, teburi koma ashitsü mejangjai yamaidang lira ayatai. Ner tsüraburtemi kidang atepzüng Aor Aotsür ka ama Aamongchen sotet ka ama oshi oben jangja jangjaa mesayutetba tejangji yamai ner telok aoera masü tsümara masü ta apuzür. Onok taintem den jembishinü timi mesütetter, otsüla obula nungeribo ner ainer oshi mashiji sadem sadema mejembitetter. Ayah! nemjemsetera semshirtem. Nenok tsüraburtem dang tanu nungi asen oshi mejateta jembitsü sayuang ta shiang no!

Ainer temeli telok: Hai otsü obu tanu nungibo nenati teach asüba amaji alitsu try asütsü. Onok tsüraburtemi onok den kasasa tangar oshi yagidang jembir aser onok correction masür ta dang liasü. Next time visit nungbo jung junga practice sür alitsüa. Otsü obu nena den junga converse mesütetba atema kangasa sasar. Saka nenati ashiba sayu otem ya kangasa senti lir, onoki ajak angatetter, onok indang parents tai tuluka lir but aji pora ektom try asütsüako no! Aji onoki promise asür. Kangasa pelara.

Talila Teyangluba telok: Onok ya alima ajak anakshia melenshitsüsang, nisung jaksü pangsü tashi melentetsang, meimchir kolok den asayatetba tematiba teyangluba (AI) putu telok lanurtemji lir. Onok asoshi tamakoktsü ta asubaji melika, onoki memetet mesüra mesütetsü ta asübatemji melika, Otsü Obu nena ya tangsa küm sermer pungu tepenjem ka ka ama yanglutetsüsa talila shisatsü aser tashi lir. Tsürabur, adianu, temeimteper süadoker alibattem bener arua külemi azütepa yangluteter. Süra Iba dang nungia ano talila temaba aser sentiba lir asü ta asungdanga, aser shisadanga arua lir.

Obula: Ayatai! Iba ama talila yanglutetba, puratetba, ajak abensa lir ama bilema, kecha menungdak ama nenoksa tulutiba aser tongtipangtiba ta bilemba talila teyangluba telok ji ya na! Ayaahh obula aser otsüla nunger asoshi tangashia mangashidang aliba, yamaji nenok telok lir ta asü dang kangasa pela bilemer ako. Saka kü temeimba talila teyangluba telok, Obulai ya dang shinur "iba jagi naji shibar mejangjatsür, aser ne indang tera ajakbo mashir , item ajak dak nungi tongtipangba aser sentiba ka ano lirko." Putusa putu sayuba, benshia aser jembiba angazüka aruba koba libaliro,wainshing,chayajako aser pei kechi nungi jakzüka aru , pei kin kidong , sobusolemtsü ayak tejangja , tim kiba lembuyim , aser kija kibong, lokdi, kishikina , kiyonger den tim lipayim koba asen Aor sobaliba dak sendaktepa lir aji tongtipangtiba ako. Nisung ka sor lia aotsüba aser aoba sobaliba tajungji nenoki memetetra aser melitetra nenoki komaka talila yangluluka aoyonga naji nüji Aamongchen chanu ka masütsü. Aser itemji nai aser nenoki talila yanglutetba nungji mesayutsü, melangzütsü, mashitsü saka lokdi puti metetettem, shisakar, temeteteterem bushia oa asüngdangtsüla aser angazüktsüla aji ta asünungdang ne ayak, ne sobutsü abensatsü. Hao! Adangji nenok iba ama senden sentong kati arua atenbaji kangasa tongtipang ka lir. Aor chanu ka ama lokdi nung ochi shia shilem agiba, maparen balala nung tasü ita nokdakba, meranga inyaka, merükteta aser asüngteta libalirobaji ajak madak tematiba aser aji nenok teka nung ama aliba talila teyangluba/AI nung jagi mangutsü. Akhidang asen tsürabur mapang pei kin nisungi longcha petinu penzür ama asen nisung penzüa nükshia arubaji tanga aika liaka, asen sobaliba tajung atema nükshiasa aru.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Karnataka nung Khristantemi Nicene Creed kum 1,700 ajungba among



Karnataka state kubok Udupi nung aliba Khristantemi 'Nicene Creed' kum 1,700 ajungba nungtem nung ayongzükba sentong ka nung telok kati ken atandang tangokba noksa nung angur.

Udipi, Metsüremi/March 27 (Agencies): Karnataka state kubok Udupi nung aliba Khristantemi Nicene Creed kum 1,700 ajungba mongogo.

UBM Memorial Hall, Udupi nung Khristantem adenshia, 'Nicene Creed' ya Khristan yimsü aser telongjem tongshi lir, ta akhüm agüja among.

Iba sentong ya UBM Church Udupi, Ecumenical Commission of Diocese of Udupi aser All Karnataka United Christian Forum for Human Rights senteper ayongzükba liasü.

Udipi Diocese apostolic administrator, Rev. Gerald Isaac Lobo-i, Nicene Creed ya Khristantem tamang tajemdakdak lir, ta metetdaksü.

Paisa, denomination balala süaka kasa tangatetba/

tesayuba amangba ajanga Khristantem rongnung telongjem ajungkettsür, ta ashi.

"Mapang ajak nung Arogoi Khristantem rongnung telongjem alitsüji tongtibang ta ashir. Second Vatican Council-ia Khristantem tanaben longjemdaksütsüji Arogo tebilemtsü lir ta shiogo. Tanela tsütsü temelung meyipba ajanga atangji telongjem tenzüker. Iba ya ajemaluba, tai atokba aser longjemer sarasademba ajanga dang ataloktsü," ta pai ashi.

"Yangi aliba nüburttem tesünep nung külemi litetba dang masü saka nüburttemi külemi sarasademer, aser ibaji ajanga nisung temeyoktep balala liaka telongjem adokdaksür," ta pai ashi.

Iba sentong nung jembidang

Church of South India, Karnataka Southern Diocese Bishop, Rev. Hemachandra Kumar-i, "Nicene Creed ya Khristantemi Tsüngrem dak tamang akaba tamendakdak lir. Kum 1,700 sülen-a iba ya ajanga maneni Khristantem telongjem nung alitsü atema ajungshir," ta ashi.

Kasa sentong nung Goa nung aliba Divine Spring Retreat Centre nung director, Rev. Rovel Shubadeep D'Souza-i Nicene Creed indang puti otsü metetdaksü aser Karnataka Theological College, Balmatta, Mangaluru nung Principal, Rev. HM Watson-i Nicene Creed indang tanela maitsü metetdakja liasü.

Iba sentong nung Rev. Santosh leniba nung telok kati ken aten.

ANOGO ABEN TSÜNGREM DEN

Tetsübuba aser tasü aitba

"Tsüngrem dak ni Pa o asangtsü: Tsüngrem dak ni tamang yuogo, ni metsübutsü; Shii kü dang kechi inyaktet?" (T. Ken 56:4).

Dawid shiba lanuwa nungi Tsüngrem dak amanga aru, yangibo pai nisung tsübuba indang ashir. Pa shibai Tsüngrem dak tamang tulu nung amanga liasü, tangbo tashi mait aküm aser nisungtem tsübu. Asen takümüji kanga junga lira, aseni Tsüngrem dak tamang ayuba nungji kecha timtem mali. Saka, asen takümü nungji timtem lendong ka arura, tetsübu jagi asenji mokbanger aser asen tamangji mejangjai mangateti akümer. Iba tetsübuba tasa nung ya, Dawid alanga liasü. Asen kümzüktsü asoshi aseni aiben Tsüngremi mulungba nung malir. Dawidi pa sasa mulungteta Gath-i jena ao. Anungji pai tsübu aser Tsüngrem dak amangtsüji tebilemtsü ka kümadok.

Saka tanaben Dawidi Tsüngrem dak tamang ayu, pai meimchir tsübuba indok, aser Tsüngrem dangi meyip. Pai pa sasa temulung lemteta Tsüngrem tekümüzüka aser anepaluba agizük (T.Ken 91: 7; 118:6). Tsüngremi asen tejashi jagi tepela kümdaktsür. Dawidi tasü ita temulungtetba nung Tsüngrem dak amang. Tatem nung, Dawidi ajangshia, meteta arubaji, Tsüngrem temeimi pa ajangzükba metet. Tsüngremi Dawid yariba amaji asenoki dang Tsüngrem dak amangra asena kümzüktsü.

Baptist seminary kati Lebanon nung rara ajanga jenshirtem yarir

March 27, 2026: Lebanon yimtiba, Beirut anasa aliba Arab Baptist Theological Seminary kati rara ajanga jenshirtem jenokdakja yaridar.

Israel aser Hezbollah telok na tsüngda raraba ajanga Lebanon nung nisung meyirjang aika jenshia tejenokdak bushir.

Seminary campus nungji tang nisung 170 shi jenoka lir. Iba seminary nung azünger 250 shi online ajanga dang class agidar, ta Southern Baptist Convention-i metetdaksü.

Baptist seminary Tir, Wissam Nasrallah-i, Israel-i Iran-i pusemba Hezbollah telok den rara tenzüka sülen Lebanon nung nisung aika tesem balala nung jenshiogo, ta metetdaksü.

Iba seminary ya Beirut yimti tezülen lir, ibayongji lendong ajanga mekongshir. Seminary-i rara ajanga jenshirtemji jenokdakja chiyungtsü den teyari balala agütsür. Iba seminary nung Middle East tesem balala nung Khristan lenirtem nem mission training-

a agütsür.

Seminary campus nung jenoka alirtemji southern Lebanon, Bekaa region aser Beirut yimti tiyong nung alirtem lir.

Iba seminary nung jenoka alirtem shilem 25 bo tanurtem lir, ta Evangelical Focus-i metetdaksü.

Iba campus anasa alir temelungertem arua sorochokba nung yariteper aser anogo shia tekülem sentong nunga adener.

Arab Baptist Theological Seminary-i Arab lima tesem balala nungi Khristan lenirtem nem training agütsür. Iba seminary ya 1950s nung Southern Baptist missionary temi tenzüka liasü aser tangbo THIMAR, Lebanese Society for Educational & Social Development-i achayanger. US nung aliba Baptist partners-i iba seminary nungita yarir.

February 28 nü US aser Israel nati senteper Iran amakba sülen March 2 nü Hezbollah teloki rocket amshia

Israel amakba mapang nungi rara tenzüka liasü. Iba mapang nungjagi tenzüka Israel-i Lebanon nung aliba Hezbollah telok amaker.

Israel-i Lebanon nung Hezbollah amak tenzüka sülen tang tashi nung nisung 700 dak tali tepsetogo aser nisung 1,774 yiruogo.

Hezbollah teloki raratsü atema ambulance aser medical facilities amshira Israel-i itemjia kcha marendaki amaktsü, ta Israel-i metetdaksüogo.

Iba rara ajanga anogo ter tsüngda nisung 800,000 shi southern Lebanon-i jena ogo. Lebanon nung nütsüng shilem 20 bo tesem balala nung jenshia lir.

Lebanon nung nütsüng shilem 30 bo Khristantem lir (Khristan million 1.2), aser iba nungjagi Khristan 40,000 bo Evangelical Khristantem lir.

Lebanon-Israel arrtsülen aliba Deir Mimas nung aliba Baptist Arogo ka nung züngsemtema aika tesem balala nung jenshia lir.

University of Pittsburgh nung kaketshir aikati Khrista agizüka bapti

March 27, 2026: Bodhbar aonung (March 25) University of Pittsburgh nung aliba Petersen Events Center nung ayongzükba Unite US sentong nung kaketshir meyirjang aika aden aser noklang aikati Khrista agizüka bapti; iba sentong ya ayaterm nung ang tembanga liasü.

Küm asem tejaklen Auburn University nung mezüng Unite US sentong agiba sülen US tesem balala nung aliba university campus tem nung iba sentong agia arudar.

Küm ana ser tesimal tsüngda UniteUS sentongtem nung kaketshir 50,000 dak tali denogo.

Bodhbar aonung UniteUS sentong nungji kaketshirtem aika sabangleni oa Khrista nem takümü bendanga agütsü, iba sülen truck nung baptia liasü.

UniteUS tenzükla, Tonya Prewett-i Instagram ajanga, "Taonung kaketshir noklang aikati Khrista den jajatsü atema telemtetba agiogo aser

University of Pittsburgh nung baptiogo! Tsüngremi campus ajak nung maneni langka tasen inyaker, aser taonunga nisung aika shi-mang nung taneptsü anguba kuli onoki nguogo. Ayaterm tashi onoki baptija liasü aser tang tashi takümü kuli aika lemsateper," ta metetdaksü.

University of Pittsburgh nung atalokba ya sangra-sangjia yangluba sentong ka ajanga masü saka asalentong yanglur renemba sentong nung Tsüngrem adenba lir.

"Tsüngremi nangzükba ama inyaker. Arogoi sarasadem, lumi aser lanurtemi tsüraburtem yimsü senmangba dang masü saka atangji lanurtemia Tsüngrem ajangshitsü, ta amanga liasü. Iba sarasademji kodak nungi langzüker," ta lai metetdaksü.

"Item kaketshirtemi yimsü angu masü saka tasü nungi shia aruba Khrista angu. Iba nungjagi joko tesülen mashitsü," ta laisa shisem.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Wangdak

(adv) Tzü atsünga atu (rising water)

* Tzümsüing agi tzü tenem tashi atua wangdaka ayu.

Wangersangma

(v) kasasa, kanga mesüktep (same as, same look)

* Sakuba o Pangerba na ya wangersangma amai kasasa tajung lir.

OLONG PAITEP # 7457

1				2				3		4
5		6								
								7		
8										
										9
		10						11		
				12					13	
14										
								15		
16										

TIPIEN

- 2. Aoui nung chiyongtsü asenba - (7)
- 5. Asür mangyima amongba - (5)
- 7. Nükjidong - (4)
- 8. Pei dak malangba mapang - (7)
- 10. Juli - (7)
- 12. Sen ayudak - (7)
- 14. Tenük-i ajitet - (4)
- 15. Tamajung aküm - (5)
- 16. Apuso - (7)

LANGTSÜNGLEN

- 1. Alo songjem - (7)
- 2. Aoer kin ka - (6)
- 3. Tenarong maten tashi manga - (6)
- 4. A _ _ _ ü - (3)
- 6. Yimyim ayim - (3)
- 9. Tagitsü mapa - (7)
- 10. Menungra bilem - (6)
- 11. Aiür - (6)
- 13. S _ _ _ ar - (3)
- 14. Lemzük - (3)

OLONG PAITEP # 7456 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER MA



United States nungi Johnny Cruz Buckingham-i Guinness World Records ka yangluogo aser iba ya pa tetsüing agi balloon teimtiba poksaba atema lir. January 2, 2026 nü Lexington, Massachusetts nung Johnny-i second 19.78 nung dang balloon 100 poksatet liasü.

Mizoram nung PAP mabener 2 apu; Ka meyipa yokogo



Aizawl, March 27, 2026

(Agencies): Mizoram nung Protected Area Permit (PAP) malir bendanger ana puogo. Tesem balala nung Slovakia nunger ka aser Russia nunger ka apu.

"Slovak nunger meyipa yokogo aser Russia nungbo meyipa yoktsü atema tayimtsü anepaludar" ta Mizoram Inspector General of Police (Headquarters) H. Ramthiengliana-i ashi.

Arishi küm 58 tain Slovak

nungba ya March 24 nü Assam Rifles-i apu. Pa ya Siaha district kübok Indo-Myanmar arrtsü anasa apu.

Iba sülen anogo ka lir Border Security Force (BSF)-i Mamit district nung Russia nunger ka apu. Iba nisung yagi Mizoram-i aotsü merangdang Tripura anasa apu.

Tena ket nung passports aser visas shitak bena liasü saka nüngdakba Protected Area Permit m maliasü. Mizoram semdangi aruba

bendanger ket nung PAP alitsüla.

Slovak nungba ya Hokolbarnü meyipa yokogo. Pa ya Thailand nungi Kolkata-i aru aser iba sülen Mizoram-i aru. Medemer kari jaokba agi pai Myanmar kübok Chin state nung water festival ka nung adentsü sentong liasü ta osang angazüker.

Arishi küm 41 tain Russia nungba ya cyclist ka lir aser pai Agartala nungi Mizoram-i bicycle ajanga aru. Pa Hokolbarnü Aizawl-i anir aruogo aser pa indang flight ticket jangjaba sülen meyipa yoktsü.

Myanmar aser China linüktem den arrtsütepa aliba Arunachal Pradesh, Sikkim, Manipur, Mizoram, aser Nagaland amala state temi aruba bendanger ket nung Protected Area Permit (PAP) alitsüla.

Assam nung Kuki SoO teloktemi armed outfits loksar

Dibrugarh, March 27, 2026

(Agencies): Centre aser state sorkartem den March 15 nü Memorandum of Settlement sign sütepa sülen Assam nung Kuki Suspension of Operations (SoO) groups-i armed organizations loksaba metetdaksüogo.

Kuki Revolutionary Army (KRA), United Kuki Defence Army (UKDA), aser Kuki Liberation Army (KLA/KLO) ajanga parnok den sendaktepa aliba units ajak March 23 nungi loksago ta ashi.

Iba agreement ya otsüsütsü

alizüing ka lir aser mangatettep nungi amalitep melenogo. Iba ajanga putepshiba aser yimtenren mapa shilem tasen ka tenzüktsü ta KRA, UKDA aser KLA/KLO külem sangdong ka nung ashi.

Parnokisa pei pei züingsemtem dang designated camps toktsür pei pei kidangi aotsü aser Constitution den putepa civilian ama alitsü tetuyuba agütsüogo.

Onoki tanga kintem den mangatettep madoktsü atema Karbi Anglong nung Kuki Tribes

Autonomous Regional Council ama tebilembatem aser Dima Hasao nung Borail district balaka tentetsü takhangbatem sota atar ta KRA, UKDA aser KLA/KLO-isa metetdaksü.

Sendaktepa alirtem den asüingdangtepba sülen ang MAC menden tasentem atema tebilembatem lemsateptsü ta parnokisa ashi.

Parnokisa Centre aser state sorkartem dang settlement nung enoka aliba onüktem mapang shitak nung inyaka aotsü ayongzükogo.

Meghalaya nung lungpok tasen kilometer 22 tema bushitetogo



Shillong, March 27, 2026

(Agencies): Meghalaya nung multi-national team kati kilometre 22 tashi lungpok tasen ngutetogo. Iba explorer telok yagi expedition ka agidang lungpok tasentem angu.

February 2 aser 28 tashi "Caving in the Abode of Clouds Expedition 2025" nung taoba mapang unexplored cave systems 22,663 metres ngutet ta Meghalaya Adventurers Association-i metetdaksü.

Iba expedition ya Meghalaya sorkari pusema nungit aser iba telok nung Austria, Germany, India, Ireland, the Netherlands, Poland aser United Kingdom nungi cavers 24 tashi aden.

East Khasi Hills district nung parnoki caves 8 sema aodang lenmang tasen 6,210 metres nguteta liasü.

Parnoki Jynria area aser Mawmai Spur nung temulung agütsü aser cave systems 16,453 metres talila bushitet.

Iba expedition nung caves 27 sema senzü aser iba nungi 18 tasen bushitetba liasü.

"Iba ajanga Meghalaya ya alima nung caving regions tongtipangba lir ta sayur aser ano lungpok aika bushiteta aotsü" ta expedition member Brian Daly Kharpran-i ashi.

"Caving in the Abode of Clouds" project ajanga 1992 nungi Meghalaya nung lungpoktem bushiteta arur. Tang tashi nung parnoki lungpok 573.6 km bushitetogo.

Strait of Hormuz shibangogo, iba tesem ajangba rong timtem ajurutsü: IRGC

Tehran, Metsüremi/March 27 (Agencies): Iran-i ano Strait of Hormuz mechi tesashitiba tekum dangtsü ka agütsüogo, aser Islamic Revolutionary Guard Corps (IRGC) ajanga iba tongtipang tzü lenmang shibangogo ta sangdong aser iba tesem ajanga aotsü merangba rong temi telangzüba tesashi ajurutsü ta tekum dangtsü ashi.

IRGC Public Relations ajanga sangdong ka nung Strait of Hormuz shibangogo aser iba strait ajanga senzür temi telangzüba tesashi ajurutsü ta ashi.

Iba amokmeren yagi Gulf nung tensa tali tamajungba akumer aser alima nung tongtipangtiba rongnung ka ta züngshiba maritime chokepoints nung timtem ajurutsü tetsübo tasen aitdaksür, kechiaser iba tesem ajanga alima totzü aser gas

supplies shilem tuluka abener. Tekum dangtsü nungsa, United States aser Israel yariba linüktem den sendaktepba rong tem nung tenokdangba ulushitsü, ta Iran-i ashi.

Ano sangdong ka nung, "America aser Israel den sendaktepa aliba aser yariba linüktem rongnendak nungi iba tesem ajanga aoba rong tem ajunga onoki nokdangtsü," ta Iran ketdangtsür temi ashi.

Iba sangdong ya ajanga Tehran-i mitkar dak sendakba rong tem senzüsempongba nung kisüing tenük yoktsü ta ashir masü saka Washington aser Tel Aviv yarir ta ajitetba linüktem den sendaka aliba commercial rong tem anema mera agitsü ta sayur.

Strait of Hormuz ya alima nung energy shishilempaba atema tongtipang lir, koba ajanga anogoshi crude oil aser liquefied natural gas barrels

million aika abener. Mapang tatsüka yangji timtem ajuruba ajanga international shipping, energy markets aser totzü aliba linüktem nung anokshitsütsü.

West Asia nung security tensa mejungi aliba mapang ka nung tang tesüsa iba amokmeren ya agütsür, kong Iran, US aser Israel mitkartem raraba ajanga maritime tebilemstü lendongpang nung lir.

Tawa commercial rong aika menudaktsüogo mesüra lenmang melenshiogo aser Gulf energy nung metaloka aliba linüktemi iba tensa kanga junga repranga lir.

Iran-i yimjak nung sangdonga aliba ama iba tesem ya shipangra, region aser rongsenketzüng tsütsü mepetmesü tulu adoktsü, aser Strait of Hormuz nung ano maneni rangloker rara tuluba akumtsü.

Nepal ato kilonser tanubutisang-i tenangzüktep agiogo



Kathmandu, Metsüremi/ March 27 (Agencies): Nepal nung September ita lanurtemi anir nokdaka sorkar lapodaktsüba sülen ita tetenzüklen election agiba nung takok tulu anguba sülen ato kilonser tanubutisang Hokulbarnü tenangzüktep agiogo.

March 5 elections nung Balendra Shah indang Rastriya Swatantra Party ajanga parliament indang lower chamber, House of Representatives menden asemsü nung shilem ana jungnüa nung takok anguba sülen Hokulbarnü Tir Ram Chandra Paudel-i pa ato kilonser inyaktsü shim.

Arishi küm 35 tain Shah ya 'political outsider' ka lir aser aikati pa dang Balen ta ajar aser pai Nepal nung amenoka aliba party tem dak tezü tanger aliba nüburtem anitsüba sorkar ka anitsü.

Sentong talang agia Cabinet züngsem tasen 15 tenangzükba agia liasü aser iba mapang "shankhnaad" mesüra 'blowing of conches' densema Hindu nunger külemkeja aser Hindu putir temi ayimtena aser Buddhist lamas nungera agia liasü.

Kathmandu tiyong nung tir aliba ki aser ato kilonser indang office kima army bands temi ken atemdang ketdangtsür aser diplomats tem lenir tasen ajurutsü atatepa liasü aser pa bhukumer noklang aika adenshia liasü.

Himalayan linük nung Ram Navami benjongba anogo anüingdang 12:34 ako nung Shah tenangzüktep agiba ya Hindu nunger putir temi mapang onsara tajung ama züngshir. Ibai numerical pattern "1-2-3-4" den apeter. Iba sülen Shah Hokulbarnü pa indang office tasenba nung nikongdang 14:15 ako nung

tetsüing ayaok aser ajia "14-15" pattern den apeter. Hindu putir temi iba ama numerical patterns ya onsara tulu ama züngshir.

Nepal nung tamangba yimsü aser nüngjang-petinu takzür temi shilem tulu agir, kong nüburtem shilem 80 dak tema Hindu nunger aser yamala takzü-takbong nung ajemdaker nüburtemi mapa tasen tenzüker, kibong akumer aser külem-keja asür. Shah ya linük yimtiba Kathmandu nung aso saka par kibong ya India den arütsü anasa Nepal nung Hindu nungeri amokbanger aliba Terai region nungi lir.

Pa ya structural engineer ka lir aser rap ken atener ka ama nüngtugu akum aser iba sülen Kathmandu indang mayor akum, aser Rastriya Swatantra Party ya pai anir lir, shirnoki bicameral parliament indang tashi tulu aliba lower House of Representatives nung menden 275 aliba nungi shilem asem lemsar shilem ana shi nung takok ngua liasü. Nisung million 30 aliba linük nung September ita lanurtemi anir nokdaka sorkar laodaktsüba mapang Shah ya tejangja nübu ka akum.

Pa longkak aitba nung indang-indanga shilem magi, saka Shah-i yimjak nung iba movement anir nokdakba Generation Z longkak aiterem bhukuma liasü.

India Ato Kilonser Narendra Modi-i X nung Shah den tepela lemsatepa liasü.

"Na shimba ajanga Nepal nung aliba nüburtemi nü lenisüba nung tamang akaba sayur. India-Nepal tesendaktep tematiba jenjangi ajungketa linük ana nübur kasa ajangzüktsü asoshi külemi inyaktsü yongta atar," ta Modi-i ashi.

STATE FOOD SAFETY AUTHORITY IN ACTION

From inspections and testing to licensing, State Food Safety Authority strengthen compliance and promote hygienic food practices across the food ecosystem.

Their efforts help strengthen

Compliance among food businesses

Hygienic food practices

The overall food safety ecosystem

STATE FOOD SAFETY AUTHORITY

STATE FOOD SAFETY AUTHORITY PLAY A CRUCIAL ROLE IN STRENGTHENING FOOD SAFETY ECOSYSTEM BY:

Preventing Adulteration

Food Safety Surveillance

Capacity Building

Community Grievance

Ensuring safer food systems and protecting public health.

**State Food Safety Authority,
Department of Health and Family Welfare.
Govt. of Nagaland.**

Sepaktakraw National Championship nung Nagaland team-i shilem tajungagi



Dimapur, Metsüremi/March 27 (TYO): Mega Sports Complex, Ranchi, Jharkhand nung March 23-27, 2026 anogotem 28th Sub-Junior (Under-14) Sepaktakraw National Championship alidang Nagaland team-i shilem tajung

agia boys' aser girls' category nung takok balala ngua liasü. Regu event nung Nagaland boys' team-i Silver medal ka aser Team aser Quad event nung Bronze medal ana ngua liasü. Girls' team-ia tajungtiba nung

shilem agia quad event nung Silver medal ka ngua liasü. Parnoki national level nung takok tulu ngutetba asoshi Nagaland Sepaktakraw Association-i tenüngsang agütsü aser tarutsü nung takok tuluba angutsü teimla lir ta ashi.

FLCoKD kümsük 2026-29 atema team tasen shim

Kohima, Metsüremi/March 27 (TYO): Football Licence Coaches of Kohima District (FLCoKD) kümsük 2026-2029 atema ketdangpur tasen shimba sangdongogo. March 20, 2026 nungi tenzüka küm pezü kümsük atema ketdangpur shimba maparen ya Nomination Committee ajanga inyaka liasü.

Visakholie Medoze ya Vice President (Administration) aser Zakietuolie Khrodi ya Vice President (Planning) ama inyaksü. General Secretary inyaksü Kevingulie Ambrose aser Joint Secretary inyaksü Neilakholie Yhome shim.

Secretary asütsü. Executive nung Thangchapu Rongmei, Keneinguze Pienyü, Kechi, Neimezo Huozha, aser Seyiekhrietuo Suohu alitsü. Advisors ama Roko Angami aser M. Mathew Yhome shim.

Sangdong ajanga ashiba agi, Vizovor Liezietsu ya kümsük tanabuba atema tir shim,

Kümsük tasenba nung Akho Sorünou ya Treasurer ama inyaksü, Diethozotuo Sechü ya Technical Director aser Keviselie Khrabvü ya Press

Team tasenbai Kohima district nung par kümsük nung football coaching standards tali tashi itshia terenelok alitsü teimla lir, ta Nomination Committee-i lemsatapa liasü.

Miami Open final nung Sabalenka aser Coco Gauff asayatsü



Miami, Metsüremi/March 27 (Agencies): World number one aser defending champion Aryna Sabalenka-i Brehostibarnü second-ranked Elena Rybakina madak 6-4, 6-3 agi takok ngua American Coco Gauff den Miami Open takok marok asoshi asayatsü.

Frances Toafoe madak 6-2, 6-2 agi takok ngua semi-final tongogo. Tenaprongi takok angunungbo, ATP aser WTA nung Novak Djokovic aser Victoria Azarenka nati 2016 küm hardcourt tournaments takok ngua "Sunshine Double" yanglutetba sülen tang mezüngbuba asütsü.

Four-time Grand Slam champion Sinner-i minute 71 nung Tiafoe madak takok ngua semi-final nung Germany nunger fourth-ranked Alexander Zverev den asayatsü, shibai 19th-ranked Argentina nunger Francisco Cerundolo madak minute 65 nung 6-1, 6-2 agi takok ngua liasü.

Sabalenka ya Australian Open final nung Rybakina-i akok aser ita tetenzüklen Indian Wells nung lai mang yangtet aser Miami Open semi-final nung Kazakh tsürla madak takok ngua liasü.

Sabalenka, shibai Indian Wells final nung Rybakina madak takok anguba mapang match point ka kumzüka ayutsüsa akum, lai la den asayar indang serve nung pressure tanen makai agüja laibo serve kanga junga agüja aces toku ngutetba liasü.

Fourth-ranked Gauff-i Czecz tsür Karolina Muchova madak 6-1, 6-1 agi takok ngua Honibarnü tetsür kija final asayaba nung shilem agitsü maongka agitet.

Kasa asayamung tebur kija asaya danga ka nung Sabalenka ama hopta ana tejakdang Indian Wells title mezüngbuba ngutetsang world number two Jannik Sinner-i America nunger

"Ni tang tajungba asayateter ama bilemer - talisa forehand nung - iba asayamung nung tanü tashi asaya aruba asoshi ni pelar," ta Gauff-i ashi.

FIFA World Cup 2026 nung Iran shilem agitsü teimla kangabo mali

Tehran, Metsüremi/March 27 (Agencies): Region nung geopolitical tensa tamajungba akumba mapang saisapongertem takum kumzüka ayutsü tebilemba nung Iran-i tsükchir ta züngshiba linük temi national aser domestic sports teams tem yokba nokdang ta sangdongogo.

Tractor FC ya Saudi Arabia nung United Arab Emirates nungi team ka ajurutsü lir. Asaya resem melenshitsu mechi Football Federation aser clubs temi Asian Football Confederation nem osang agütsütsüla, ta ashi.

Iba totuyuba ya Ministry of Sports and Youth ajanga agütsü aser local media tem nung prokshia liasü, koba February ita tatemlen Iran, United States aser Israel tsüngta rara tenzüka sülen iba osang ya angazüker.

Iba ya ajanga FIFA World Cup 2026 atongtsü lia asendenshir teimla samadaksür, koba atema Iran ya qualify süa lir. Parnok ya group-stages asaya tem United States nung asayatsü lemzüka lir aser fixture nung New Zealand, Belgium aser Egypt den atar. Ajüsüaka US nung football asaya nung Iran shilem agitsü teimla kangabo mali.

"Tarutsü nung sangdong ka magütsü tashi tsükchir ta züngshiba aser Iranian athletes aser team members nem security magütsütetba linüktem nung shilem agiba nokdang," ta ministry ajanga ashi, anungji tesem kar nung international jenjang nung shilem agitsü okdangba tejangja akumer.

Ano ken o tali tebenjaba kumdakja US Tir Donald Trump-i tawa ang iba asayamung nung Iran shilem agidaksütsü saka "life and safety" tebilemstü alitsü akok ta ashi.

Iba telemtetba ya ano AFC Champions League fixture asayatsü aliba ajanga ajungmeso, kong Iranian club

Matches tem Mexico-i belener aotsü atema FIFA den jembishinü akaba mapang lir ta Iranian football federation tir Mehdi Taj-i tejangja shia lir.

STATE OSANG : Tapak 2 nungi...

Nagaland Assembly nung Jan Vishwas Bill...

Iba legislation yagi sectors balala nung state ozüngtem yanglushir aser yangji town planning aser municipal governance nungi labour, tourism aser taxation tashi lir - anungji ozüng aika melenshiba sayur.

entrepreneurs atema business-friendly environment adokdaksütsü ta shia lir.

Statement of Objects nung temelenshi yagi investor temulung ulushitsü, bureaucratic friction ajemtsü aser talisa MSMEs aser small

Temerenshi nungi bendenba revenue tem State indang Consolidated Fund nung inoktsü aser exchequer nung senotsü tebilemstü tali tulu malitsü.

Mokokchung nung Clean Election...

Deputy Commissioner & DEO Mokokchung, Ajit Kumar Verma, IAS-ia NBCC dang Clean Election Movement tenzüka atema pelaba lemsatap aser iba yagi state nung election inyakyim tesunep nung ochishia, mürekteta agitsü asoshi temelenshi bener aruba nung yaritsü, ta ashi.

Iba Bill ya Deputy Chief Minister Yanthungo Patton-i Brehostibarnü benoka liasü aser Hokulbarnü voice vote ajanga agizük.

Tzüzüng-ozüng ya tenokdangba mera ka ama amshir, aser stakeholders ajunga lungjemba ajanga aginüba ama temelenshi

angutsü, ta pai ashi. Iba senden nung Rev Tamsu Jamir, Executive Secretary ABAM ajanga Clean Election Movement nung pa tangatetba lemsatapedang, iba movement yagi lokti nung kongshitsü, ta ashi.

BILEMDANGANG
"Tenüng tulu nungi pila liang, yangji sang aika lir, aser chichiba tajangzük mali."